



Naoberkracht op Witteveen zorgt veur verbinding

De bladern weien rond Dorpshuus de Tille op Witteveen. Een jonge man en vrouw lopen naor binnen en haolen heur hond op bij de trimsalon. Een trimsalon in 't dorps-huus? Jazeker, en dat niet allent, in dizze veurmaolige schoel vinden je een fysiotherapeut, een jeugdsoos, een sportzaoltie en een mooie rume kantine. De Tille stiet bol van de activiteiten. In de hal hangt een fotoserie met pertretten van inwoners. Naost de grote boekenkast waar aj gratis boeken lenen kunnen, hangen twee priesen.

Interview: Jessica Bonnema. Foto's: Petra Hessels

Het Witteveense initiatief Naoberkracht kreeg de Dorps-vernieuwingspries van de Landelijke Vereniging van Kleine Kernen en de Henk Aaldrink-pries van P10, het samenwerkingsverbaand van de dartig grootste Nederlandse plattelaandsgemientes. Vrijwilligers Josina Wielink en Grietje Oortwijn binnen de zörgzame en betrokken vrouwen achter Naoberkracht. 'Kom derin,' zeg Josina intied zij de deur lös holdt. 'Hej zin an een koppie koffie?' vult Grietje heur an. Het regent hard buten, maor binnen stralen Josina en Grietje as zij het over Naoberkracht hebben. Duo Naoberkracht, zoas zij ok wel nuumd worden, is het aanspreekpunt veur inwoners die tiedelijk een haandtie extra hulp gebruiken kunnen.

Olderwets naoberschap

'Vrogger kwamen der op Witteveen mènsen oet Zuudoost-Drenthe wonen umdat hier meer wark was as daor. Iederiene kreeg een geit en een stel kippen bij hoes. Daor komp het symbool van Witteveen, de geit, weg,' zeg Josina. Mènsen hadden toen niet veul en waren op mekaar anwezen. Van

oldsher vinden wij in Drenthe het naoberschap hiel arg belangriek. Starker nog, wij hadden mekaar neudig um deur zwaore tieden hen te kommen.

Naoberschap wil zeggen daj met je naoste burenen in verbinding binnen en met raod en daod veur mekaar klaorstaon. Maor met de sociale veurzienings van de leste decennia en daorbij goed vervoer en winkels um de hoek, lek het soms asof naoberschap in onze samenleving al minder belangriek wordt. Waor de ien het naoberschap nog in de vezels hef zitten, hef een aander der niet zoveul met op. Mènsen vraogen zuch of: Hoe warkt dat dan, naoberschap? Kriej dan te pas en te onpas mènsen over de vloer aj hulp neudig binnen? En as ik hulp anbiet, zit ik daor dan maonden an vast? Daor hebben zij zuch op Witteveen iens in verdiept.

Het begun

'Jaoren leden kookten een antal inwoners op een aovend veur aandere inwoners,' begunt Josina. 'Zo raakten zij in gesprek met mekaar en dielden heur ideeën, waaronder



het in kaart brengen van mēensen die een aander, in geval van nood, wel hulp zulden bieden willen.' Een lang verhaol kōrt: Veul inwoners vunden dat een goed idee. Ien van heur maakte een computerprogramma waar Grietje en Josina alle gegevens in kunden zetten. Josina vertelt: 'Mēensen dielt heur persoonsgegevens, kruust in een liest an waormet zij zulden helpen kunnen en schriefft heur eigen talenten op.' 'Aj bijveurbield docent bint, kuj invullen daj jongern helpen wilt met heur hoeswark,' legt Grietje uut. 'Zo bint der weer jongen die op heur beurt bij oudere mēensen wat klussies in de tuun doet.'

Mēensen moet zuch bewuster wezen dat zij buren hebt

Naoberkracht verbindt

Het duo Naoberkracht giet op de fietse bij alle inwoners boven de achttien en bij de neie inwoners langs en zet iederiene die metan doen wilt in heur systeem. As der iene is in joen directe omgeving die tiedelijk wat hulp neudig hef, vrag het duo aj helpen willen. Der wordt een appgroepie anmaakt van ongeveer zes buren waarin de hulpvraoger zeggen kan wat of hij neudig hef. Hulp duurt nooit langer as een week of zes. Hej daornao nog langer hulp neudig dan giet dat over in professionele hulp. 'Wij gaot professionele hulp ok niet in de weg zitten,' zeg Josina. Naoberkracht is der veur de extra dingen. 'Aj een gebreuken arm hebt, kunt de buren de hond oetlaoten of een keertie veur je stofzoegen.' Grietje vult an: 'Helpen kan hiel gezellig wezen. Der was een inwoonster met ALS. Daor kwam een buurvrouw langs zodat de partner hen sporten gaon kun. Soms spraken wij met twee buurvrouwen of. Dan meuken wij der met zien drieën een mooie middag van.' Jammer genug kwam dizze inwoonster uut de tied. 'Natuurlijk hej dan veul verdriet. Deur Naoberkracht draag je samen wel veur altied de mooie herinnerings bij je.' 'Mēensen blijft verbunden met mekaar. Dat ziej bij een vrouw die oeteindelijk naor een verzōrgingshoes boeten het dorp mus,' glimlacht Josina. 'Heur buren, een echtpaar oet Witteveen, gaot niet met zien beiden op bezuuk, maor apart van mekaar. Dan komp der tweemaal iene langs. Da's mooier veur heur.' Het dōt heur goed as mēensen zo naor mekaor umzien.

Hulp vraogen

Hulp vraogen is veur sommigen een hiele drōmpel. De drōmpel wordt op Witteveen verleegd deur veul activiteiten te organiseren. 'Die staot op de dorpskalender. Je beleeft mooie dingen met mekaar en je kunt het in een ontspannen sfeer



hebben over waj samen metmaakt,' zeg Grietje. 'As wij heurt dat mēensen misschien wel hulp gebroeken kunt,' vervolgt Josina. 'gaow daor langs. Even vraogen hoe of 't giet. Weej wat het is? Mēensen moet zuch bewuster wezen dat zij buren hebt. Buren en familie bint de eersten diej um hulp vraogen kunt. Kunt zij je niet helpen, dan kuj altied met ons kieken welke Witteveners dat wel kunt.' Grietje vult Josina an: 'Het kan natuurlijk dat buren al zōrgtaken hebt, of mu bint. Dan mugt zij gerust zeggen dat het niet oet komp. Het is gien verplichting.'

Naobertaart

'En wij hebt de Naobertaart!' juicht Grietje. 'Daor kuj mekaar veur opgeven. Wij reikt 'm maondelijks oet en de taart wordt bakken deur een Witteveense.' Iederiene komp met zien taart op de foto. Josina lat der iene zien van een lachende man met een grune taart met marsepeinen molshoopies derop. 'Hij hōlp mēensen mollen te verjagen.' Het duo zet op hiel biezondere manieren hoe weerdevol heur wark is. Kōrt naodat de oldste Wittevener een Naobertaart veur zien verjaordag kreeg, kwam e uut de tied. 'Zien familie hef de foto van de man met zien Naobertaart op de rouwkaart zet.' Het duo is evenpies stil. 'Ja, dat dōt je wel wat.'

